

To'on yó'o kían nì taa San Pablo nì sa'an noo Tito

Ká'an Pablo ndisá'an xí'ín Tito

1 ¹ Yu'u kúu Pablo, na kéchóon noo Ndios, ta kúuí iin apóstol, na né'e to'on Jesucristo, dá ná kasandaá ñayuu nì kaxi Ndios kandeé ká'ano iní na Jesús, ta kasandaá ta'ani na kana'á ná to'on ndaa sa'a mií ná, dá ná kandeé ná kee na tátō'on kì'o kóni Ndios, ² ta ná koo tandeé iní na ña iin kuu koni na kataki chíchí ná. Ta mií vá Ndios nì xì'o to'on na ña koo dión ndá rá ko ñá'a kasá'á ñayuu yó'o, ta ko ká'an to'ón ta'on na. ³ Dá tá nì kasandaá kuu nì chikaá ini mií Ndios, dá nì na'a na to'on ndaa sa'a mií ná. Ta nì ta'anda choon nooí ña dána'i ña noo ñayuu nì kee mií Ndios, na dákaki ñaá.

⁴ Ta ká'an yu'u ndisá'an xí'ín yo'ó, Tito. Ta miían ndaa kuiti kúúon tátō'on de'i sa'á ña kándéé inon Jesús. Mií tatá yo Ndios xí'ín sato'o yo Jesucristo, na dákaki ñaá, ná kee ña mani xí'ín yo'ó, ta ná ku'u ini na sa'on, ta ná kì'o na ña koo va'a inon.

Di'a kánian kee ta sá'ano xí'ín ra ká'an kane'e choon noo na kúu kuendá Jesús

⁵ Nì dankoo yu'u yo'ó yúku íin ini taño'o naní Creta, dá ndeyíkon choon noo na kúu kuendá Jesús xa'an, dá kì'ón choon noo ra sá'ano, dá ná kandita ra noo na kúu kuendá Jesús ndéi iin rá iin ñoo xa'an tátō'on kì'o nì sa'ándái choon nooon. ⁶ Tído ná kakuu ra iin taa kéndísá'ano noo ñayuu, ta ná kakuu ra yíi iin tó'ón ñá'a, ta de'e ra ná kakuu ta kándísa Jesús. Ná dá'a ni ka'an ñayuu ña kúu xí takuáchí kini, o takuáchí koó ñañó'ó.

⁷ Dá chi miían kánian kendísá'ano iin ra ndáka na kúu kuendá Jesús, chi noo mií Ndios nì natiin ra choon yó'o. Ko kánian kakuu ra ra ndeé to'on, ni ra yachi karyíí, ni ra kátóo ko'o, ni ra kátóo tandó'ó, ni ra kée sa'a di'ón maña. ⁸ Di'a kánian kakuu ra iin taa natiin va'a ñayuu ve'e ra, iin ra kátóo kée ña va'a, iin taa ñó'o ndi'i ini, iin ra kendaá, iin ra káa vii noo Ndios, iin ra kándéé chituu mií noo ña kini. ⁹ Ta kánian kuiin toon ra xí'ín to'on ndaa tátō'on kì'o nì dakuá'a ra, dá ná kati'a ra ka'an ni'ini ra tátō'on dándáki ña ndaa sa'a Ndios, dá ná kati'a ra kadi ra yú'u na kátóo dátúú ñaá.

¹⁰ Dá chi ndéi kua'á nda'o taa ndeé to'on, ta kátóo ra dána'a ra to'on ko chón, ta kóni ra dándá'í ra na kúu kuendá Jesús. Ta ra kée cháá ka dión kúu ra ká'an ña kánian ta'anda ñií ra kúu kuendá Jesús. ¹¹ Ta miían kánian kadi yo yú'u rá, dá chi xionoo ra nádaká rá ñaxintóni ñayuu iin rá iin ve'e xí'ín ña ko kánian dána'a ra, chi kée ra sa'a di'ón maña. ¹² Ta iin de'e ñoo mií vá Creta xa'an nì taa sa'a ña kée taa ñoo ra, chi di'a

kua'an ña ni taa ra: "Daá ta to'on nda'o kúu ra ñoo Creta, ta kúu rá ta nde'é, ta kúu rá ta dusa, ta kiti nda'o kúu rá." ¹³ Ta ndaa va ká'an ra, xiní yu'u. Sa'á ñoo koo inon dánani va'a chááon ra kée dión xaan, dá ná kandita ndaa ra xí'in ña ndaa kándisa yó, ¹⁴ dá kían ná dá'a ka ni kekuendá ra cuento to'on ni kava'a dao ta Judío, ta ná o kekuendá ka ra choon sa'ándá taa ni kexoo noó ña ndaa sa'á Ndios. ¹⁵ Ndidaá vá ña'a kúu ña'a vii noó na kómí iin níó vii. Tído noó na kómí iin níó yakó xí'in na ko xí'in kándisa Jesús, ndidaá vá ña'a kúu ña'a yakó noo ná, dá chi ndino'o ña kini nákani ini na, ta yakó nda'o ñaxintóni ná. ¹⁶ Kaá ra ña ná'á rá Ndios, tído xí'in ña kée ra ná'a ra mií rá ña kúu rá ta to'on, dá chi kúu rá ta tikini, ta kúu rá taa ndeé to'on, ta ni lú'u ña va'a ko kándéé rá kée ra.

Ta koo inon dána'on táto'on káa rá ió ña ndaa kándisa yó

2 ¹ Tído yo'ó, kua'an yo'ó ndi'i inon dána'on táto'on káa rá ió ña ndaa kándisa yó. ² Koo inon dána'on noó ta sava'a ña ná kaño'o ini ra noó ña'a kée ra, ta ná koo ndísá'ano ini ra, ta ná kendísá'ano ra, ná kuita ndaa ra xí'in ña ndaa kándisa yó, ná ku'u ini ra sa'a dao ka ñayuu, ta kueé ni ná koo ini ra. ³ Dión ta'ani ná koo ini na ñá'a sava'a, ná koo ndísá'ano ini na. Ná dá'a ni kanoo na kava'a na ña to'on, ta ná dá'a ni kakuu na na kátoó ko'o. Ndino'o ña va'a ná koo ini na dána'a na ⁴ noó na ñá'a kualí, dá ná katí'a na koni na yíi ná xí'in de'e kualí na, ⁵ dá ná kaño'o ini na noó ña kée na, dá ná kakuu na iin na ñá'a kéndísá'ano, dá ná katí'a na kanda va'a na ve'e na, dá ná koo va'a ini na, dá ná kaño'o toon na tixi ndá'a yíi ná, dá kían ná dá'a ni ní'i ñayuu ndí kían ka'an ndava'a na sa'a to'on Ndios.

⁶ Ta koo ta'ani inon ka'an ni'ínón noo takuáchí yíi ña kían ná koo ini xi kaño'o ini xi noó ña kée xi. ⁷ Ta chikani miíón ña kían keva'ón noo ndidaá ña'a kéeón, dá ná katí'a xi keva'a xi. Ta noo dána'on, koo inon dána'a ndaaon, ta dána'on xí'in ñañó'ó, ⁸ ta dána'on xí'in to'on ndaa, dá kían ná dá'a ni ní'i ñayuu ña ka'an ndava'a na sa'on, dá ná kaka'an noó na xiní u'u ñaá sa'a ña ko ní'i ná ndí kían ka'an kini na sa'a yo.

⁹ Ta ka'an ni'ínón noó na ñó'o tixi ndá'a iin sato'o ña ná kueídó'o ñaá ná, ta ná ndukú ná ña nata'an ini ra. Ná dá'a ni ndane'e yú'u ná noo rá, ¹⁰ ta ná dá'a ni koo kue'é noo ndá'a ná. Di'a ná kenda na ndidaá choon tá'andá noo ná, dá kían xí'in ña kée na, ná chindaya'i ñayuu ña ndaa sa'a Ndios, na dákaki ñaá.

¹¹ Dá chi ni na'a túu Ndios ña maní ni kee na xí'in ñayuu, dá ni'i ndidaá ná ndi kee na káki na. ¹² Ta ña maní yó'o kásto'on xí'in yó ña kánian dánkoo yó ndidaá ña kini xí'in ña kátoó na kúu kuendá ñayuu yó'o kee na. Ta kásto'on ta'anian xí'in yó ña kánian kaño'o ini noó ña kée yó, ta kandeí ndísá'ano yó, ta kandeí yó kee yó ña kóni Ndios.

¹³ Ki'o dión ná kee yó nani ndéi yó ndáti yó tandeé ini ndato kua'an, chi

ndáti yó ndato náye'e noo nandió koo Jesucristo, na kúú Ndios ká'ano, na dákaki ñaá, kasaa na. ¹⁴ Chi ni nakì'o na mií ná ni xi'i na sa'a yó, dá ni kuu ni taó xóo na yó tixi ndá'a ndidaá ña kini. Ta ni nduvii ná yó, dá ni nduu yó ñayuu mií ná, dá ná ndi'i ini yo kee yó ña va'a. ¹⁵ Dión koo inon dána'on noo na kúú kuendá Jesús, ta ka'an ni'ínón noo ná. Ta xí'ín choon né'ón koo inon dánanón na ko vá'a kée, ta ni iin tó'ón ñayuu o sa kónó kenóo na yo'ó.

Ni dandóo Ndios kuachi yó sa'a ña kándéé iní yo Jesús

3 ¹ Dándusaa inon na kúú kuendá Jesús ña kánian koo ñañó'ó ná noo ta né'e choon xí'ín ra dándáki ñaá. Ná kueídó'o ñaá ná, ta daá kuití ná kandeí nduu na kee na ña va'a. ² Ta ná dá'a ni koo ini na ka'an u'u na sa'a ni iin ñayuu, ta ná dá'a ni katoó na tandó'ó. Di'a va'a ná koo ini na, ta nda'í ná koo ini na xí'ín ndidaá ñayuu. ³ Dá chi tá sa na'a sa kuu yó ñayuu ndeé to'on, xí'ín ñayuu do'ó, ta sa xionoo ndava'a yó, ta sa ño'o yó tixi ndá'a ndidaá ña kini sa katoó mií yó xí'ín ña kini sa koni ñi yo. Ta ni sa kuu yó ñayuu xíxi ini, xí'ín ñayuu u'u ini. Sa ndukú yó ña kían koni u'u ñaá ñayuu, ta sa xini u'u tá'an yó xí'ín dao ka na.

⁴ Tído iin kuu ni na'a Ndios, na dákaki ñaá, ña va'a ini na, ta ni na'a na ña kú'u ini na sa'a yo, ⁵ dá ni dakáki ñaá ná. Tído ko ní dákáki na yó sa'a ña ni kee yó ña va'a. Di'a ni dakáki na yó chi ni ku'u ini na sa'a yo. Chi ni dandóo na kuachi yó, dá ni nakaki saá yo, ta Espíritu ií mií ná kúú na ni ndee saá ñaá, ⁶ chi ni dakútí Ndios nío yo xí'ín Espíritu ií mií ná sa'a ña ni kee Jesucristo, na dákaki ñaá. ⁷ Dión ni kee na, sa'a ñoó ni kandoo vii yo noo Ndios sa'a ña maní ni kee mií ná sa'a yo, dá ná kuu natiin yó noo tatá yo Ndios ña kataki chíchí yó, chi ña yó'o kúú tandéé iní ió noo yo.

⁸ Ndino'o ña ndaa kían ká'in xí'ón, sa'a ñoó xíkai nooon ña ndundééon dána'on ña, dá ná ndi'i ini na kándísa Ndios kee na ña va'a, chi ña va'a nda'o kían, ta chindeéan ñayuu tá ná kee na ña. ⁹ Ta ná dá'a ni ndat'ón xí'ín ñayuu sa'a to'on ko choon, ta o sa ndat'ón xí'ín ná sa'a ndá tixi ni kii iin rá iin na sá'ano. Ta ná dá'a ni chidáó tá'ón xí'ín ná xí'ín to'on, ta o sa dándichí tá'ón xí'ín ná sa'a ley Moisés, dá chi ko ndáya'i ña kee yó dión, ta o chindeé tá'an vaan yó.

¹⁰ Tá nákaa iin ra sa'ándá tá'an ñayuu noo nátaaka ndo xa'an, dá kían dánanón ra iin ta'ándá, uu ta'ándá. Tá ko seídó'o ra ña ká'on, dá kían taó rá ná ko'on ra, ¹¹ ta kana'ón ña ni kana xoo va ra noo ña ndaa, ta sa'a kuachi kée vá rá ni kedaá xí'ín rá, sa'a ñoó ni ndo'o ra dión.

Di'a kánian kee mií Tito, kaá Pablo

¹² Tá ni tanda'í Artemas o Tíquico kosaa ra noo nákaaon xa'an, dá kían koo inon sa'on ni'on yu'u ndá ñoo Nicópolis, dá chi ni chikaa ini ña ñoó kooi yo vixi. ¹³ Ta koo inon chindeéon Zenas, tá'an ra ná'a ley,

xí'ín Apolos, ta k'ón ña'a xínñó'ó rá noó ko'on ra dána'a ra, dá kían ni iin ña'a ná o kámani noo rá. ¹⁴ Ta dána'on noó na kúu kuendá yo ña naki'o na mií ná kee na ña va'a, ta ná chindeé ná na kámani ña'a noo, dá ná kakuu na iin na kéchóon va'a noo Ndios.

Xí'ín ndisá'án yó'o dándí'i Pablo ña ká'an na xí'ín Tito

¹⁵ Ndidaá vá na ndéi xí'ín yu'u yó'o ká'an ndisá'án xí'ón. Ta ka'an yo'ó ndisá'án xí'ín na kándísa dáó xí'ín yó ndéi xaan, tá'an na kú'u ini sa'á ndu'u.

Ná koo ña maní xí'o Ndios xí'ín iin rá iin ndó. Dión ná koo.